



UPA 2026/76

17/6-2026

Pipaluk Olsen

Piniakkat angisuut, soorlu Qilalukkat qaqortat qernertallu pillugit ullumikkutut kisitsisarneq ingerlanneqartassanersoq imaluunniit atortorissaarut pitsaanerusut atorlugit kisitsisoqartalissaneroq pillugu oqallisissiatut siunnersuut

(Inatsisartunut ilaasortaq Gerth Mikaelen, Naleraq)

Inatsisartunut ilaasortap Gerth Mikaelenip matuminnga oqallisigisassanngortitsineranut qujanaq. Piniagassanut tunngassuteqarpoq, aammali piniartunut taakkulu ulluinnaannut tunngassuteqarluni.

Aallarniutigalugu piniartunut ataqqinninnerput, qujamasunnerpullu Demokraatinit anngukkusupparput. Inuiaqatigiinnitsinni piniartut sulii qitiulluinnarput. Nerisassanik pilersueqataapput, kulturitsinni pingaaruteqaqataasumik ingerlatitsipput, amerlasuullu ulluinnarminni nalaanneq ajugaannik atugaqakkajuttarlutik. Piniarneq inuussutissarsiutaaginnangilaq. Inooriaasiuvoq misillittagaqarfiusariaqartoq, sapiissuseqarfiusariaqartoq, akisussaassuseqartariaqartorlu.

Tamannarpiaq patsisaalluni malittarisassiuussinerit, pisassiisutillu pillugit aalajangiinerit sapinngisamik ilisimasanik tunngaveqarnissaat Demokraatinut aalajangiisuvoq. Uumasut amerlassusaat pillugit ilisimasagut pitsaanerutillugit, aalajangiinerit naapertuilluarnerullutillu uppernassuseqarnerussapput. Tamanna tamanut iluaqutaassaaq, minnerunngitsumillii piniartunut.

Tunngaviumik isumaqarpugut, kisitseriaatsit allanngortinnaveersaarneqassanngitsut. Inuiaqatigiit ineriartortarput, teknologi ineriartortarpoq, assinganik piniagassat pillugit ilisimasanik katersisariaaserput ineriartortariaqarpoq. Imaangilaq sionatigut periutsit kukkunerusimasut, imaapporli ineriartornermut malinnaanissatsinnut ammajuaannassasugut.

Ukiuni makkunani teknologi ineriartupiloorpoq. Sensorit nutaat, assinut atortut pitsaanerusut, qaammataasiatigut nalunaarsuutit, minnerunngitsumillu AI (qarasaasiaq atorlugu periarfissaatitaasut /kunstig intelligens) nutaat, ukiualuit matuma siorna piviusorsiorpallaarsimangitsunik nutaanik periarfissaqartitsipput. Assersuutigalugu uumasut nikerartarnerat pillugu paasissutissat annertuut, ileqquilu pillugit ersarinnerusumik misissueqqissaarnissamut AI (kunstig intelligens) tapertaasinnaavoq. Aaqqiissutaanngillat suliatigut ilisimasanut imaluunniit inuit misillittagaannut taarsiisussat, sakkussaallutilli aalajangiinissamut tunngavimmuut nukittorsaataasinnaasut.

Tassuunatigut periarfissat nutaanerpaat eqqumaffiguarnissaat Demokraatinut pingaaruteqarpoq. Erseqqinnerusumik kisitsinissamut, amerlassutsit paasilluarnissaannut, taamaalillunilu eqqornerusumik malittarisassiuussinissamut teknologit nutaat tapertaasinnaanersut ataavartumik nalilersortassavarput. Aalajangiinerit ilisimasanik tatiginartunik, nutartikkanillu tunngaveqarnerusussaammata ineriartorneq



tamanna naggataatigut piniartunut iluaqutaasinnaavoq.

Ilutigisaanik ineriartorneq tamanna piniartut qanimut suleqatigalugit pinissaa aalajangiisuuvoq. Kinguaariinni ineriartortitanik piniartut misilittakkanik aallaaveqartumik ilisimasaqarput. Ilisimasaq taanna ataqqineqarlunilu akuutinneqassaaq. Aalajangiisartut, piniarnermillu inuussutissarsiuteqartut akornanni avissaartuutsinissamut teknologii sakkussanngunngisaannassaaq. Killuanik ilisimasat, misilittakkat, aqutsinerullu akornanni ataqatigiissitsinissamut teknologii atorineqartariaqarpoq.

Tamanna pillugu Demokraatit isumaqarput ataavartumik ineriartortitsineq, alapernaatsuuneq, akisussaassuseqarnerlu ukkatarineqartariaqartut. Periutsimik ataasiinnarmik atugaqassanngilagut, sakkussalli pitsaanerpaat piginerlutigit immitsinnut aperiassalluta. Nungusaataanngitsumik aqutsinissamut erseqqissumik kisitsinerit pinngortitamik, tassanngalu inunnik inuussutissarsiuteqartunik eqqarsaatiginnillutik tunngaviupput pisariaqartut.

Piniagassat pillugit ilisimasagut sapinngisamik erseqqissuujaannarnissaat qanoq qulakkiissanerlutigu, taavalu misilittakkat, teknologiilu nutaaq piniartunut, pinngortitamut, kinguaassatsinnullu iluaqutissanngorlugit qanoq pitsaanerpaamik atussanerlutigit pillugit kinguneqartussamik oqallinnissarput qilanaaraarput.